

SOALAN NO. : 168

**DEWAN RAKYAT MALAYSIA
PERTANYAAN BUKAN JAWAB LISAN**

PERTANYAAN : BUKAN LISAN

**DARIPADA : PUAN RUBIAH BINTI HAJI WANG
[KOTA SAMARAHAN]**

TARIKH :

SOALAN :

Puan Rubiah binti Haji Wang [Kota Samarahan] minta MENTERI SUMBER ASLI DAN ALAM SEKITAR menyatakan statistik pencemaran udara dan usaha-usaha yang sedang dan akan dilaksanakan antara Malaysia dengan negara ASEAN lain bagi memastikan masalah pencemaran udara yang sering melanda kawasan serantau ini dapat diatasi.

JAWAPAN:

Tuan Yang Dipertua,

Untuk makluman Ahli Yang Berhormat, statistik pencemaran udara yang diterbitkan oleh Jabatan Alam Sekitar (JAS), melalui Laporan Kualiti Alam Sekeliling pada tahun 2012, menunjukkan bahawa jumlah *emission* bagi gas karbon monoksida adalah sebanyak 1,873,730 tan metrik, gas nitrogen dioksida sebanyak 877,364 tan metrik, gas sulfur dioksida sebanyak 198,519 tan metrik dan *particulate matter* sebanyak 6,049 tan metrik. Punca-punca utama pencemaran udara tersebut adalah dari kenderaan bermotor, perindustrian dan loji jana kuasa.

Di peringkat ASEAN dan serantau, Malaysia merupakan negara anggota yang berperanan aktif dalam menerajui isu-isu pencegahan jerebu serantau, melalui Mesyuarat “Conference of the Parties (COP) to the ASEAN Agreement on Transboundary Haze Pollution” dan “Ministerial Steering Committee (MSC) on Transboundary Haze Pollution”, yang diadakan secara berkala. Melalui kedua-dua forum tersebut, Malaysia komited untuk menyokong usaha-usaha berterusan oleh Kerajaan Indonesia untuk mencegah kebakaran tanah dan hutan serta jerebu melalui, “Indonesia’s Plan of Action (POA) in Dealing with Transboundary Haze Pollution”, yang telah diwujudkan semenjak tahun 2006. Ia dapat dilaksanakan kelak melalui pemeteraihan Perjanjian Persefahaman (MOU) bagi program-program pencegahan jerebu, melalui usahasama Kerajaan Malaysia dan Wilayah Riau, Sumatera, Indonesia. Kerajaan Indonesia juga telah digesa untuk segera meratifikasi Perjanjian ASEAN Mengenai Pencemaran Jerebu Merentas

Sempadan dalam Mesyuarat MSC Ke-16, yang telah diadakan di negara Brunei Darussalam pada 2 April 2014.

Sekian, terima kasih.

SOALAN (169)

**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : BUKAN LISAN

**DARIPADA : Y.B. PUAN RUBIAH BINTI HAJI WANG
[KOTA SAMARAHAN]**

SOALAN :-

**Y.B. PUAN RUBIAH BINTI HAJI WANG [KOTA SAMARAHAN] minta
MENTERI KESEJAHTERAAN BANDAR, PERUMAHAN DAN
KERAJAAN TEMPATAN menyatakan apakah Kementerian telah
menjalankan audit akses di bangunan Kerajaan dan awam bagi
memastikan semua premis ini adalah bebas untuk golongan kelainan
upaya.**

JAWAPAN :-

Tuan Yang di-Pertua,

Untuk makluman Ahli Yang Berhormat, Kementerian Kesejahteraan Bandar, Perumahan dan Kerajaan Tempatan (KPKT) melalui Jabatan Kerajaan Tempatan ada melaksanakan audit akses tersebut dengan tumpuan kepada bangunan-bangunan PBT secara berperingkat. Program audit ini telah mula dilaksanakan pada tahun 2012 dan sehingga kini telah melaksanakan audit di 25 buah PBT yang melibatkan 27 bangunan/ kemudahan PBT sedia ada.

Pada tahun ini, Jabatan Kerajaan Tempatan akan meneruskan pelaksanaan audit akses kemudahan OKU ke atas beberapa lagi projek-projek bangunan awam di bawah penyelarasan PBT iaitu di Majlis Bandaraya Kuala Terengganu, Majlis Bandaraya Ipoh, Majlis Bandaraya Bersejarah Melaka dan Majlis Bandaraya Johor Bahru sebelum Sijil Perakuan Siap dan Pematuhan (CCC) dikeluarkan bagi memastikan pihak pemaju menyediakan kemudahan akses OKU yang mesra dan bebas halangan.

Disamping pengauditan ke atas bangunan PBT, pihak Kementerian ini juga bekerjasama dengan agensi kerajaan lain bagi membuat audit akses

bersama-sama Kementerian Pengangkutan, Kementerian Kesihatan, Kementerian Pembangunan Wanita, Keluarga dan Masyarakat, NGO dan OKU di bangunan awam seperti KLIA2, Terminal Bersepadu Selatan (TBS) Bandar Tasik Selatan, Institut Kanser Negara (IKN), Kuala Lumpur Convention Center (KLCC), Taman Tasik Titiwangsa, Hotel Berjaya Times Square dan KL Sentral.

Kementerian juga turut menganjurkan Kursus Rekabentuk Sejagat dan Aksesibiliti Orang Kurang Upaya (OKU) kepada Pihak Berkuasa Tempatan pada tahun 2012 dan 2013 yang bertujuan untuk memberi latihan dan simulasi OKU secara khusus bagi membolehkan PBT menjalankan sendiri audit akses. Kursus-kursus ini akan dapat meningkatkan kompetensi pegawai-pegawai PBT semasa melaksanakan audit kemudahan akses OKU dan peningkatan sistem penyampaian perkhidmatan PBT kepada masyarakat. Program audit ini akan diadakan berterusan setiap tahun bagi meliputi PBT lain supaya pihak-pihak berkaitan seperti pihak pemaju, juru perunding dan PBT sentiasa peka mengenai keperluan dan kemudahan tersebut.

Kementerian Kesejahteraan Bandar,
Perumahan dan Kerajaan Tempatan
Jun 2014